

孝求以爲妻許之楊歸隣未幾翁姑相繼逝求吉壤倉卒不可得隣焦
急甚楊思有以紓其意密持翦翦膺肉和香禱神乞妥先人之靈俄而
得之隣心以慰後見其創問知所繇以爲孝感有丈夫所不能爲者云
後生子衡猷登鄉薦楊及見之尋卒年四十三衡猷後成進士官知縣
衡猷子乃孚亦舉人官教諭竝自有傳

寇宗重慶府志
張乃孚合州志

程頌妻李氏合州來里方溪口人李年二十一頌卒無子撫頌兄子宇
鷺爲嗣程故大族宇鷺弟兄多類發名成業有聞于時李恐宇鷺或不
類爲已及家門羞特善教之宇鷺亦登明萬曆辛卯鄉薦從諸昆間無
媿色不久卒無後李又撫從孫鱣承祧教養一如宇鷺聞者賢之啟禎
間流賊起土匪尤滋擾有過其門輒相戒曰此賢德程太夫人居也無
敢入李得以安壽終于家其年頌墓有連理枝生鄉里鷺異以聞于朝

詔旌表其閭

大清一統志寇宗重
慶府志張乃孚合州志

苟桓妻李氏合州人初歸桓翁姑健在姑劉故江南舊族隨宦來川爲
苟氏婦號偁難事李奉之得其歡心諸娣姒亦忻合無間劉嘗病危李
遞割兩股和藥以進得瘳後劉臨歿謂李曰吾他無所祝祝汝多子孫

合川縣志卷五十一列女一

二

一如汝之事我也桓得鄉舉後歷校官知縣家食日少李家居奉親習
勤苦安儉素人皆化之前後數十年家無廢事人無廢業李內助力爲
多焉桓病且篤羣醫束手李再刲股飼之疾以豁然聞者皆謂其誠感
也桓官永甯時與教授吳啟泰同署通家見李敬桓如賓亟偁曰賢及
李卒啟泰爲誌其墓寇宗修重慶府志特表其相夫持家爲閭里所矜
式云李卒于嘉慶九年未幾而其從孫苟培緒妻馮氏亦以賢婦著馮
故里名宿任清溪校官鎮巒長女也性敏慧鎮巒授以內則女誡等書
旁及唐宋人近體詩輒能領取大意偶承命爲韻語亦娟秀可觀少長
從事女紅以吟詠非閨閣所宜遂擯而弗爲能識大體動遵禮法有古
賢媛風年十九歸培緒伉儷綦篤居恆未嘗有違言而時匡其所不逮
姑戴蚤逝庶姑張熊皆參預內政培緒以家督奔走其間庶務叢脞不
無掣肘之虞每怫鬱不能自遣馮委曲承順彌縫其闕務博翁姑歡以
寬夫壻之憂由是家庭雍睦勃谿不作無遠近皆歸賢焉鎮巒在官聞
之心大憫而顧以其喜儉嗇善居積不御羅綺飲食亦從節省獨專力
于家政雖斗粟尺布皆躬自檢點不以煩瑣爲嫌也則又憐其過勞特

書飭家人歲給秋稅十數斛爲其雇工服役費馮受而弗用偶遇荒歉則以貸里中之不給者而薄責其息是以有隱惠而無逋租不數年積穀無算子鍾漢尤工計然術爲之酌盈劑虛因以財雄一族本之馮也馮宅心仁慈遇可矜憫事輒爲感歎弗置夫族弟榮祿幼孤與其弟妹貧無依馮勸培緒挈之家殷勤撫字起居服食躬爲經紀之比成立乃去鎮巒子春山蚤死遺孤在襁褓族中無賴頗魚肉之馮使鍾漢代整飭其家事捍禦外侮得以粗安堂弟馮某課童子讀饘粥時弗給馮假貸之屢矣後迫于揭佃以基地質春山婦郭郭堅不承馮憫其艱窘復以數十千畀之不責償其他借本不還而又周之如此類者殆未可一二數也道光二十三年卒年五十五

苟氏族譜李馮孺人傳寇宗重慶府志

馮良弼妻苟氏合州西里人父企滂國學生母劉遂甯知縣某女故江南舊家來適苟氏生子五宗魯拔貢桓舉人內外家皆文學科第照耀一時苟生其間耳濡目染迥異凡近長適良弼生子七以次子鎮巒貴例封孺人既歿鎮巒追述其事狀曰鎮巒少承先君之訓乾隆癸卯年二十三始補博士弟子員是冬先君下世又十年濫厠賢書先孺人年

合川縣志卷五十一列女一

三

五十六矣居嘗誨之曰吾自歸汝家知爾三世清門未有敗德汝當勉爲正士汝父早世兄若弟皆汝一人乎是望卽以繼父志也嗚呼巒學殖荒落讀書少成今年且四十不能博升斗祿以養親而二三兄弟亦未有能自立者先孺人且於今二月初六見背自顧茫茫未知所極安能稱道母德所冀畜德能文之士哀其志而載諸筆庶足以垂示於無窮先妣姓苟氏外祖洪範公外祖母劉生母一人舅氏五維翰公乙酉選貢毅齋先生辛卯孝廉卽巒所從學者也母爲劉太孺人所鍾愛能得其歡心太孺人歿爲之哀毀踰節諸舅氏以世宦舊族喜言先人孝友媿睦及國初時軼事母聞之最熟憶不肖兒時自邨塾歸夜火篝燈身困欲眠先妣爲言一二事以驅睡魔殘更夢回復一詳述時雖幼稚亦頗欣欣自得聽之忘倦方孺人歸我先君也不逮事祖妣先大父喜賓客時與邑文士接先妣爲備酒漿無瓶罄之恥先大父稱之曰賢家老僕及僕婦子女十數人先大父待之有恩往往驕惰不事事先妣含容之謂若輩事翁久翁所矜恤之人我何敢以婢僕齒至今復姓寧家每歲時來覲皆言孺人厚德能善體先大父意平生無疾顏厲色於巒

師友往來獨極慎重同里萬毓華中表苟方泉苟月村來則喜語家人具雞黍茶鐺酒琖雖竭日不厭以諸君能束修自愛具有血性故也朱修武師白髮老諸生年八十餘博學多聞朴質有古先民風貧甚幾難舉火先妣語巒爲之計薪米費先生來潔饘舖哺後童子束薪負米送之歸數日不來持豚蹄一盂園蔬數品命人往奉之嘗曰此汝少時師今先生老矣吾素淡於飲食汝所以奉我者悉以奉之先生然後爲吾願之所適性儉素見鮮衣華食者必斥之己酉巒赴省闈貨建昌羔裘一領爲母製冬衣卻之不御曰汝父一生幾曾服此然汝身單弱保身卽以事親吾命汝服於義亦未爲失巒再請許之然後強服壬子獲雋製錦衣兩襲母色稍喜巒而大悲慟先君之不及見也存之篋笥後欲更製不能倉皇時遂以是備小斂巒待諸弟過嚴先孺人外是之而內不善也密語巒曰汝不見汝父之於伯乎伯待汝父嚴父能順事之世之弟事兄如汝父者幾人憶爾輩幼時大者攀衣小者乳抱幾料今之有成汝不善教將視爲棄才矣言已泣下所以語諸弟者不及聞卽諸弟亦未有聞乎此也村姑里嫗時推解以濟其貧乏有勸之誦佛祈年

者獨不許曰吾以慈厚宅心可以對佛何必口頭持誦年來羣盜縱橫人無寧趾先妣獨坦然謂兒輩無憂我必不死於賊故兩年避地境危而心不亂以有母故也今竟以疾終可憑者安在耶嗚呼舛矣先妣生乾隆二年丁巳二月初七日戌時卒嘉慶四年己未二月初六日申時享年六十有三子七長鎮峻次卽不肖次鎮峒鎮岫鎮嶺鎮岷鎮嶸孫男六人母歿之前月巒次女淑昭殤時居定遠已在牀褥聞其死哭之母歿後十日巒一子雲官死母不及聞也追維平生何能畢述夢中時見慈顏對之泣醒則茫然矣含悽珥筆固向者所不及料也嗚呼晴雲山房氏文集苟氏族譜鎮巒妻龔氏亦有婦德鎮巒爲之行狀曰予讀蘇子瞻銘其亡妻王夫人之詞著語不繁悽人心脾且偁夫人能識大體竊疑子瞻卓識乃有假於夫人子瞻銘之若不勝情嗚呼古人閨內之助其相係乃如此予婦龔孺人同里成均進士近古公之女也早歲歸予逮事先父母數十年得其歡心喪葬如禮生一子兩女次女淑昭殤一子雲官亦殤納側室生子蓬萊復生兩女隨予遠宦清溪至之日泫然曰祿薄足養惜先姑不及見矣地瘠官卑君無以爲念故予雖遠隸邊徼頗具沖

淡之趣者以室家能相安也不意歷數年而孺人病病踰年而卒卒之前三日告予曰吾死此矣去家千里重以累君無棄我於異域歸葬先姑墓側姑待我厚魂魄所依也他無所囑而卒孺人賦性寬厚勤敏篤於孝養其母苟與先太孺人爲從堂姊妹行孀居數十年得重疾久卧牀第不愈孺人刲股以進嘉慶四年己未太孺人避居定遠時抱病孺人亦病稍差聞姑病垂危亦刲股以進閱後數年見兩癥痕宛然每爲泣下予疎懶性成飲食酒饌之具不甚關心而甚好客每客至絮語扳談輒刺刺不休晡時忘所以讌客者高呼入廚則雞黍已具同時好友如萬棗峯龔敘亭苟千之來輒竟日夜不去無慢客者在當時亦不甚覺也主講雲峯時歲在戊午時達匪不靖蹂躪明月里東西雲峯去家數十里中間一河予歸訓練鄉團孺人獨留館中一夜賊踰華蓋焚燒居民屋宇光燭館中墻壁如晝邨舍驚逃孺人傳語學侶曰若等未可去遲至天明摒擋一切負幼子攜兩女兩姪冒雨行至江干呼舟截江徑渡抵家謂予曰君棄我矣然一身事頗堪支柱者不急歸恐遺君憂耳予笑頷之先太孺人生予弟兄七人孺人來歸時諸弟皆幼稚衣履

衿裾歲常紉綴無算一身兼制不以言勞主中饋外手無停時憶值除夕予偶倦假寐起聞刀尺聲丁丁然一燈熒熒粧閣前縱橫皆是物也太孺人常曰吾堂姊習於勤苦是兒酷肖其母予所喜也每持以爲諸娣姒訓予每讀書至夜分笑謂予曰君讀書有味乃如此惜無福作男子不知他生得向儒地中來否其疾也以癱瘓客歲五月廿日神思不屬就寢跌地不能言醫治數月杖而能行將復初逮今正月食漸減猶起居如常故未送歸病革未及月而卒非所料也蓬兒方十歲哭之哀予淚難禁不能效莊生作達也昔蘇子述其父老泉言以爲婦從汝於艱難不可忘宜葬其姑墓側予援蘇氏例送之歸葬母墓側亦猶先太孺人意也乃含悽珥筆而爲之狀

晴雲山房文集

李世瓊妻苟氏合州西里人父檀母喻氏旌表節孝自有傳苟歸世瓊以相夫教子有賢聲道光五年年六十子瑞廷耀廷竝州學生請以其姻馮鎮巒文爲之壽鎮巒因序之曰吾合詩人李筍峰之德配苟孺人爲吾表姑姑喻太孺人之季女吾母苟太孺人之姪中表姻親苟雨峰先生之妹氏也筍峰祖來自麻城家於合之石筍溝因以爲號嘉慶初

達匪不靖偕孺人避地白沙苟氏里第筍峰與雨峰爲外兄弟托宅棲處筍峰工計然術孺人佐之不數年家累千金遂以貲豪里中筍峰歿孺人承其家法義方教子蜚聲鬢序者二人餘亦各自樹立孺人之賢可知矣道光乙酉秋七月孺人年六十親黨循例稱觴時予秉鐸黎州已十有五年嗣君瑞廷耀廷走書千里以敘言爲請竝寄壽略曰母氏逮事先大父稱其歡心事吾父以和順聞吾父病母刲股以進其他中饋修潔禮待宗親餼廩盈虛出入必問而於瑞廷弟兄從師問業尤不令曠功一日此雖庸行之常然而母氏勞苦然後瑞廷等得以幾微有成也又吾父在日雅耽吟詠常與先生爲詩友名宿劉鶴坪先生亦亟稱之憶早年諸老攜韻來家吾母必爲潔治壺觴剪韭烹雞以助清詠先生想所目擊卽此一二端先生或可不吝載筆乎敢再拜以請李生之言如此夫無非無儀詩人志之言不出閫禮家重之婦德原不必以奇行著也一自仇母湛母而後苟能勃谿不事舉步相莊其亦可矣而況孺人之克明大體懿行無忝如是是不足爲近代之女宗歟昔孺人之母喻太孺人歷試諸艱苦節教子雨峰曾屬予爲作傳先慈苟太孺

人溫恭淑慎有孝有慈巒曾敬紀行述載於家乘世守淑誨後先輝映今紀述孺人之賢揆以兩母令範足覘家法以是效岡陵之祝不尤爲親切不膚歟予馬齒長矣四方之志未嘗以暮年稍歇踰年亦將暫息里門猶憶筍峰舊有句云石橋分路梅花屋田水遶村荷芰池此中風景如在目前倘他日杖策歸來登堂起居見諸子蒸蒸日上孺人顧而樂之愈以克享遐齡則今日之稱觴特其始事耳諸子勉乎哉筍峰世

瓊字也

晴雲山房文集苟氏族譜

胡某妻陳氏合州東里人故明侍郎胡世賞六世孫嬪也清初自石龍場分遷楊柳溪遂以楊柳溪著籍焉嘉慶十四年年七十子廷訓適董雲峰鄉校事延舉人馮鎮巒主講卽乞鎮巒爲其壽序曰吾合先賢弘治時則有忠介鄒公啟禎時則有大司寇胡公皆以清德重望文章勛伐重於當世予爲鄉後進思得其子孫之賢者而交之嘉慶己巳復主講雲峰於時鄉校旣廢復興司寇七世孫廷訓倡修書院講堂齋舍動費多金始終不倦予心異之問其何以如是答曰此家慈意也於是其母陳孺人年且七十矣予尤心異之是秋延至其家庭訓再拜請曰傳

無似承賢哲後先司寇世澤凌替至此亦既羞言華胄矣然猶幸衣食粗安得以留一綫於今日者皆吾母氏之力也猶憶乾隆庚寅先君見背母年二十有九傳九歲弟偶甫三齡耳瑩瑩母子望影對形族中羣不逞乘間竊發妄希吞噬假權理爲名僅分升斗以給朝夕不許則無端叫囂凌逼萬狀母不得已寄兩孤於外以一身左右之或理遣或含容卒能相保無恙俾傳等得以成立此數十年中艱難辛苦淚漬襟裾傳所不忍盡述戚里至今有能言者後其黨貧甚母不念前隙猶時分餘金資之吾母素諳大體自先世遺業外增置產若干庚戌春命傳修治高祖以下墳塋另劃田數頃使子侄中之貧乏者耕之歲收其入以供春秋祭先司寇世科坊在合城之廣濟門內母命獨力重修嘉慶己未宣漢多故命倡修萬全砦於楊柳溪捐貲六百餘金用保鄉里母不以爲費傳今馬齒四十有七矣母教之內慈外嚴事無巨細必稟命而後行稍有不若於道者譴呵必及故傳夙夜刻勵獲見齒於鄉先生之前不致擯爲異類者皆母氏之教也惟是諸孫輩母望其讀書有成克繼先業故鄉學之立叮嚀至再焉乃少者長者楚楚在庭聰慧幻爲泡

影愚魯惟辯菽麥遠念先型近思母德傳誠碌碌無足比數不意若輩亦復如斯烏烏私情不知所報明春二月親友爲母介壽稱觴願得先生一言以爲重余曰此真無愧胡公冢婦矣聞故老傳言忠介夫人劉弱齡後矢志冰霜至七十餘白首完節故至今忠介祠中配饗內寢今君母之節與其賢且能如其嗣音歟然予更有爲君言者繼自今君於雲峰鄉校其益加意振飭俾人才輩出吾黨二三子必能取賢母之賢而咏歌之焉知尊庭賢後後遂無繼司寇而興者吾知上之太史可與古賢母比烈此予於先賢之後所以樂與君交不厭者此也不然拾祝嘏之膚辭侈賓筵於閭里區區具文又烏足爲賢母重哉森楷髻鬣時聞其文爲彭懋琪書胡氏甚寶貴之相傳以爲重今胡氏衰落不可

問矣

晴雲山房文集

戈鑑妻謝氏州西城營盤街人性貞靜笄年歸鑑逮事翁姑以賢孝著數年鑑卒遺孤廷幹甫二歲謝年亦僅二十五耳戈爲州奇姓家故不豐族戚亦罕可告語者謝泣血誓天勉自強立日夜紡績以供甘旨及修脯之需必蠲必優初不以貧窶解而廷幹從羣兒遨頗好嬉戲幾廢

讀謝呼歸責諭之且引古斷機事以譬情文兼至聲淚俱下廷幹亦感
激流涕遂奮志力學惟日孳孳恐復以懈弛貽謝憂也後中式嘉慶戊
午舉人謝尙及見之十四年廷幹以謝守節年例已符請旌表建坊報
可時謝已以所蓄買田宅建祠堂矣遂建坊於祠前在今館驛門內路
北現存

寇宗慶府志
張乃孚合州志

鄒秉衡妻趙氏合州西里人性質素自在室已不喜羅綺惟聞人談古
今節烈事則欣然忘倦及歸秉衡琴瑟甚敦而秉衡有志顯揚恆溺苦
于學積勞成疾不數年卒趙痛欲身殉姑以有遺腹胡絕夫嗣諭之乃
止及生男也心爲少慰甫晬而教匪起兵戈所指人命草菅斷脰橫屍
所在皆是男子無免何論婦人不受污而死者有受污而仍不免于
死者覆巢之下完卵幾希鶴唳風聲人無生氣趙獨緦孤子扶衰親逐
風塵犯霜露賊至則走賊去則歸奔馳于兩江間者蓋七八年無甯晷
亦幸不與賊遇卒得全身全姑兼全其子至賊平而子已及幼學之年
矣趙訓誨殷勤絕不假以詞色出就外傳專擇嚴師課餘歸家輒以讀
書立品相勸勉子亦恂謹受教無少年輕薄氣趙意乃安趙六十壽子

合川縣志卷五十

列女一

八

將爲請旌趙不許曰從一而終婦人天職養親教子亦分內事耳豈以
夸于人哉何旌表爲子固請卒不從乃罷道光十年卒年六十三其鄰
朱嶺秀文學爲誌其墓且贊之曰流離播遷之餘殉難成節者有矣孺
人獨委曲求全而卒無所挽妣續一綫綿延茲始非智勇以濟其堅貞

何克臻此

鄒氏
宗譜

丁汝驤妻陳氏合州西里人父中溶太學生陳少小知書女誠列女傳
略能上口及適汝驤方應童子試不得意性頗卞急陳婉順之殷殷勸
讀卒以遊鬻汝驤身素羸以攻苦過猛積成勞瘵漸不起陳焚香禱天
割右臂煎湯進汝驤以爲藥也者而飲之雖未平復稍能起行遲至一
載乃卒說者皆謂陳之精誠延之也時陳年二十六便毀容守志撫兄
子樹揚爲嗣爲娶婦任氏未及抱孫而樹揚亡矣任感姑操亦守節不
嫁兩世同心一門雙節人皆謂其足爲丁氏光門楣焉後數載陳病任
侍湯藥寢不解衣者數月又爲誦佛經數藏以祈福延齡病良已又數
載與諸伯叔析箸得銀數十兩移居雲山砦佃土自活陳雖貧也而慮
患操心過于男子弟汝安嘗語人曰我輩雖讀書有大事必咨吾嫂蓋

不及其智謀遠甚非諛詞也復爲任撫子燦宗零丁孤苦內外支撐惟姑婦是賴時人以謂守節難守無子之節尤難至無子而又無錢守節尤難乎其難陳任乃皆不畏其難如金鍊益堅玉磨益皎卒難宛轉全貞作疾風之勁草陳固鐵中錚錚任亦庸中佼佼有是姑方有是婦其殆有相觀而善者與陳卒年六十五任卒年八十八清光緒中竝請旌表題准建坊入節孝祠

中學教員丁燦緯來稿

陳在瑛妾萬氏順慶南充縣人生而赤貧年十三爲其家鬻于平康里教以送迎賤事萬不甘墮落恆啼泣拗命被撻至流血卒不從妓家遂奴視之有年矣會在瑛至順慶問知其狀爲出貲贖身挈歸合州而在瑛嫡妻妬故有妾楊已生子銘鑒猶使執婢侍役在瑛恐萬之不堪也則爲外室如衛太叔故事萬詢得其故謂非久計亟請覲夫人在瑛猶豫未決萬遽命輿往登堂請見拜之嫡妻不知以爲客也亦盈盈荅拜萬旣自陳嫡妻頗不平業無可如何則亦以好語相款遂竝見楊如姊妹禮一無齟齬在瑛心乃安自後三妻共夫偶有違言萬輒婉婉將順調停其間卒得笑言歡娛如故而止說者謂柔能克剛自李勢妹得之

合川縣志卷五十一列女一

九

于南平公主而後此爲僅見不虛也數年在瑛卒萬年十九事嫡長有加禮而在瑛家自其祖介峰老人以來世傳詩畫多不問家人生產在瑛尤揮霍入不供出逋負綦多佃重租輕收量銳減在瑛存日已岌岌不支至是債主雁行戶屢常滿少遲應付狺哮交加嫡妻不耐其煩旋憂鬱死楊亦莫知所爲計也萬念事勢至此難可安居而內外紛如兼營不易乃與楊議分任其事以服食日用及教育子女諸梱內事由楊主之而自當收租償責一應外事旣秩然有條理又偵知某責不盡實某責非所自爲遣人爲關說之不聽則訟諸官得實而責無效如是者數四諸僞責自退餘亦不復尅期相求家遂得以輪轉楊亦節嗇無浪費不十年夙累爲清同治中增置雞冠坪雷家灣羅家溝田業數處可三百畝楊卒子銘鑒成立且授室矣仍尊萬爲內主家事一切皆稟命而行不敢以父之妾易視之也萬一行其素無所于遜家亦日隆隆上及光緒初萬以壽終銘鑒自理家事有昔闢今蹙之異乃歎萬之健婦持門爲不可及而在瑛顧于風塵中物色得之亦具眼矣

陳氏族譜竝陳蘊山口述

劉肇光妻曾氏州興里舖山堙人性剛嚴自爲室女言笑不苟姻鄙皆

敬而畏之及歸肇光佐理家政傭僕竝受命惟謹不敢有惰容然宅心仁恕有孤貧戚鄰向求資助者未嘗不適宜給予俾得資生特慵孌不事事欲依賴以爲活則不可得耳既生子景學肇光復納妾譚人皆謂其必不容而曾顧善待之使有子景康視同己子見者不知其異母也譚亦無恃寵驕縱惡習事曾如母曾撫之若姊妹人以是兩善焉同治九年肇光卒曾譚皆二十餘家裕子幼人不無妄有覬覦曾譚相依爲命節操凜然慮二子或不謹則富終不可保乃特厚脩脯延師教之卒有成立自家用外一無浮費前後十餘年凡買田數百畝街房若干較舊業增式廓矣曾仍行其儉樸之素一無所改惟歲時施濟貧乏人益眾數益多未嘗少有吝也光緒二十三年當事以其守節年例適符爲請旌于朝得報可三十二年卒年六十四葬日遠近來觀者咸咨嗟太息謂如斯人之積而能散乃不媿坤靈之爲富媪云譚今存興里采訪員來稿

丁樹誠妻陳氏以樹誠貴例封孺人先樹誠卒樹誠爲之傳曰孺人諱淑貞吾合西里大鰲壩人也代稱望族至其父大坤公易農而商家中落孺人年及笄嬪于予生具慧根未讀書能明大體事翁姑得其歡心

養敬喪哀秩秩纍纍禮無違者妯娌四易齟齬迎以和氣久而自安家口繁多儻耕不給仰食于衰親之筆數米而炊糝以藜藿每食不飽孺人晏如也予歸自館必勸以學以爲家窘若此親臘又高不勤讀何以給俯仰且妻以夫貴夫無志閨中無吐氣日矣自是讀書益力數年遊泮遲之久後叨鄉舉孺人勸相力也方昆仲之析居也家無斗儲乃佃別業耕之鹽米之陵雜牧豎之採作皆肩于孺人間寄館金輔其不足孺人積藏之不輕耗遞歸猶可指而數餘積有年家小康凡今之能賃高屋置薄產者由孺人再造予何力之有焉舉子四女二教女無論子可讀矣必俟能就外傅始行之館而課之然則生而養養而教皆萃于孺人之躬予祇勞其半而已性溫厚終身無怒容三黨有貧乏量力賑恤之不稍吝然自奉恆約無故不嘗珍製美衣終年不一御偶染霜露自諱其病不親延醫服藥因之境彌豐身彌瘁受瘵深矣調攝未豫一疾而歿悲夫孺人生道光丁酉歲至光緒十七年歲次辛卯告終年五十有三卒之日鄰里罷舂族親執紼聞風者感歎其賢有告以續絃者應之曰狐裘雖敝不可補以黃狗之皮噫難其人矣贊曰不矜異能不

尙奇節養親事夫柔順且哲振興家道含辛茹蘖婦德無虧是謂卓絕
識者謂雖以夫傳妻可比郭有道碑無愧色云

中學教員丁
燦緯來稿

張壽山妻劉氏森楷母也以光緒三十一年卒于東里楊柳溪私第年
七十又三森楷爲哀啟曰先慈稟賦素強以外王父劉家中落不自聊
年十四來歸我先考壽山府君與先伯父母居亦舊族新衰無資相活
惟傭書取給女紅佐之時從兄家楨方襁褓先伯母撫愛甚不暇任家
務舉箕帚井臼諸陵襍煩勞事一責之先慈或食有不足亦先慈忍饑
焉無敢反唇勃谿爲先考內顧憂也而體氣以稍孱矣烏虜傷哉居三
歲析炊從先考賈遂甯食貧如曩日因數產不育收路遺女嬰養之年
饑艱食分已膳以哺貌爲癯先考不謂然乃以乞染人某爲子婦後十
餘年猶通問如媼家卽相待可知已咸豐乙卯旋里家益窘不能具租
佃賃某氏廡下襍牛宮以居見者爲不能堪先慈怡然其中以紡績自
助或勸走姻家求賙貸謝不應先考相顧忘憂不覺無生人趣也戊午
誕森楷庚申誕適胡氏妹竝不半日起治事凡勞力風寒免乳大忌者
舉無所于避蓋諸病根此矣烏虜傷哉辛酉避賊安全砦先考應城守

役勿顧家先慈僱傭轉徙塗遇練軍甚威同行皆辟易先慈肅立道左
容色無怍過軍滋益恭聞者咸稱異焉其年先考病失明度不能兼濟
命自爲計先慈泣以死誓事之恩禮加平時先考意大安壬戌下砦誕
第二妹不舉乙丑誕適魯氏妹亦且棄之有鄰嫗苦禁始更收養然形
神俱不勝疲勞而痰火疾作矣烏虜傷哉丙寅先考逝世先慈搶呼泣
血痛不欲生以森楷及二妹故未及從殉猶剪髮入棺自代族戚哀其
義爲釀穀數石錢十數串畀之俾營子母自活先慈之得稍有憑藉自
茲始也然亦僅矣烏虜傷哉戊辰族曾祖廷宣召森楷讀其家先慈詣
言學食費仰累衣履則自任旃族曾祖頷之繇是歲致無差且有餘布
藏篋衍待用今猶存五端爲手中線之遺以示後人則其時之勤劬何
如也烏虜傷哉丙子森楷入泮報至先慈色喜已而淚涔涔下憾先考
不見之後得賢書報復如是是其恩義之篤終身無間視生而怨谷風
傷化離者相去殆不可道里計而顧不得少留以範世也烏虜傷哉戊
寅森楷讀書省垣先未赴省時謀約會百金供家用久不集不獲行先
慈聞其然誨言尔家素貧吾固能自立兒有志向上但守吾平日口穩

手穩身穩之戒以求發名成業斯願足矣區區家用何慮爲森楷受教去後遂歲以課獎所得分寄二三十金佐朝夕費別致十金爲先慈藥餌用每臈歸問訊則必以平安無恙用適相資告無餘存亦無過求也詳察其實則自以所有營運而留寄金不動意俟積成數乃爲森楷買田宅遺子孫故雖效逆日急猶習見爲常不屑屑求治亦不輕易頤養服食及禱祀祈求之爲固其強立堅卓性行使然非憐森楷貧而欲富之猶未必遽至此則實森楷不才以累親也烏虜傷哉甲申乙酉之交森楷嘗舉所供奉見斥存不用者設詞勸進先慈爲舉田舍翁得此已過僮子備官未聞之意相教戒且以先考不逮爲辭至淚皆熒熒然森楷知不可強乃謀歸侍養得隨時用情會連見黜于有司意亦倦遊遂以丙戌決計東還掌振東鄉校七年依川東道黎先生幕二年皆幸親奉板輿色笑欣承雖無當於孝養萬一但念先慈往歲看演琵琶記伯喈思親一齣不覺潛然今則否矣之言始知古人不以三公易一日之養誠有味乎言之允宜堅而守之而森楷竟何如也烏虜傷哉丙申黎先生去官森楷持前議歸鄉里外館一切謝不行先慈知之謂吾老尙健而食指稍益繁不及時有輸入後彌弗逮矣固督令出森楷不得已復歷就錦江伍先生建昌王觀察鄰水吳明府之聘暨井研施太守之託充任書院襄校主講蜚桑公社社長等事唯鄰水近得迎養餘皆雲山遠隔風雨遐思苦親心之日多舉子職之日少矣烏虜傷哉先慈向持病不治得中醫之說自森楷所知四十年間唯庚午時疫癸巳內熱乙未赤利三度病重嘗乞靈刀圭其餘風寒感冒溼熱浸注等證固皆以正氣勝之終不相敵甫一近醫藥亦中病而止不善後也家人有以請率逢怒見詬詈乃已獨森楷婉求多蒙許可使得常依鄰下早圖幾先則病卻年延自意中事而顧多營他務罕侍親廷則先慈病日以深森楷罪日以重也烏虜傷哉先慈之病始去夏五月僅微下利泊七月而甚至悶絕復蘇森楷時權學忠州未之知也或擬飛電召歸以病少瘳不果九月森楷還問得狀慙悔甚然旣漸康復且聞醫言精力雖衰神明不敗壽徵也則私心竊喜謂其言不謬補報尙有期耳不意愈未半年病更作而遂不起也烏虜傷哉方病未作時嘗稍致葺燕等品爲補益計訖冬盡如故自疑無效更進醫診商之醫言餘邪尙留當與清

理一劑無他再劑乃苦心煩腹脹滿後遂喘不得食手足頭面盡腫延夏歷秋不異至十月十二日丑時竟棄森楷而長逝矣烏虜傷哉先慈少單寒中更憂患垂老裁能自給而惜福過甚未嘗享受須臾雖亦叨荷敕封服用乃不過與下中人等而遽精神未憊形體不存則是森楷奉養多疏侍疾無狀以致之也律以春秋誅許止之罪森楷無所逃于天地間矣烏虜傷哉此森楷居憂時所自草也雖尤長尚翔實今具錄之觀者或不以爲阿私溢美乎先君諱某今偁字非自亂其例也亦史公不名談之意云爾

慎密堂叢稿并記

唐一銀妻王氏州東里遵導觀人年十七于歸逮事翁姑能以色養一歲翁姑繼逝又一年一銀卒王年裁十九也無子遺女一族人來弔王撫女泣曰唐氏一支惟此而已柰何或疑其有貳志乘間諷之王指天自誓乃爲撫夫兄子承桃一銀家故不豐連遭數喪家如懸磬負債山積王不以自餒省衣縮食百端經營嘗負是呱呱者臨井汲水入野求芻艱難之情人不堪苦而處之怡然行所無事不十年宿逋盡償饗殮差給嗣子稍長養教兼之嫁子取妻費出一手初不覺其窘亦未嘗告

合川縣志卷五十一列女一

十三

勞也民國四年卒年八十三

東里採訪員唐兆莫投稿

姚德萬妻曹氏州城內人年十六適德萬家故貧夫兄德修貿帽店家稍稍裕德萬初業儒至是從學賈差自給三載翁爲榜卒未幾德萬亦夭曹年二十姑兄公憐其少寡無子微以意諷之曹指天自矢曰夫死吾當死所以未死者擬待兄有子爲夫立嗣耳若他適不如死會店貿贏餘置房十數間歲入錢四十貫有資矣無何姑兄公先後死遺一女三歲形影相弔者內則曹與嫂及其女外則十四齡之夫弟德超而已有戚謂之曰人生世間若輕塵棲弱草何自苦如是且夫家兄死弟幼將焉賴曹涕泣對曰夫歿無子兄公歿又無子姚氏所以存宗祀者惟夫弟耳又少不更事棄安忍然是時營貿無人因停業拮据甚乃與嫂以十指度日用撫夫弟如子暇輒以翁與兄公及夫前日勤苦事爲德超道之勗其學又三年遣就錢店習業復擇婚劉氏爲完配雖極窘不惜輾轉籌措以竟其事既見錢店須本重爲人傭得資無幾婉與族戚商集會貸資仍理帽業以德超董之前二十餘年餅子街之義順帽店是也德超有綜核才居數年置田六十畝忽病故遺子本達九歲弟婦

劉慟欲死曹慰之曰有子在何憂妹雖苦強吾多矣自是復停貿遷文華街撫本達如己出針黹之餘惟課讀是勤冀成立以延一線脈少長爲籌婚配不以其爲從子而有卸也然氏雖愛憐之甚或偶有違教則亦必反覆誥誡不少事姑息民國成立自由者多乘時顯榮本達亦欲藉此□進以爲宗族親戚交游光寵曹涕泣責止之本達乃屈意獨清不隨俗波蕩矣特以家累學未竟轉執醫業慰伯母志甲寅五月州大火斗米直二千八百曹慮民饑匪熾或釀變且不測遽出歷年所餘鍼工銀五十金付其表姪鄧成之于大南下街正順米店爲糶濟而隱其名成之以杯水無濟轉與本街宏昌正吳瑞符推廣募施設局平糶費達二千餘金全活甚眾自曹發之也五年曹卒壽七十五曹先以清光緒二十六年被旌竝准建坊入祠今不知實行否斯有志風化者之責

也

興里採訪
員投稿

劉俊三妻易氏州興里三佛灘人生而天資卓絕言笑不苟喜慍不形于色人莫測其津涯最爲父母鍾愛及長教以閨訓內則諸書及古今故實可法可懲者聽之終晨夕不倦年十七歸俊三初俊三蚤孤伯父

合川縣志卷五十

列女一

十四

肇鼎撫之成立易因事伯父母如所生待娣姒如姊妹始終無間言而治家尤整肅有法度凡蘋蘩酒醴之大米薪井臼之微莫不措置咸宜舉無遺誤肇鼎見其能始命析箸四載俊三卒易慟而絕絕而甦者再勺水不下咽數日肇鼎慰之曰子幼家艱非若不足善其後柰何以一死塞責易始強起撫二子運嘉運森歎曰天禍我家邁此閔凶我非不能從若父于地下顧汝旣孱弱失怙復失恃零丁孤苦豈能苟延旦夕乎是以勉從汝伯祖囑耳後二子稍長易懼其失父遂失教一言一動必繩以矩出入必問其地師友必擇其人聞有通儒耆德必使往晉謁求教益歸必叩其所問得藥石言則色喜否則戚然恐米鹽瑣屑妨誦讀功綜家政一切自操之不使或預聞亂意二子皆感激奮勵克自樹立運嘉試前列未售以積勞成瘵疾死僅遺運森猶不少寬假終得以純謹克家侁性尤篤愛三黨周卹不遺餘力如夫堂兄藜齋病歿無後貧不能具葬易爲出貲瘞宅右招其母蔣氏及其妻熊氏同居肇鼎歿後遺繼伯母蔡易亦常迎與共處服食起居視親有加禮曰我非好名聊以報昔日鞠育恩耳後卒喪葬盡哀禮焉父載庵歿遺子照藜簡書

及女六人照藜旣出繼簡書與諸妹竝釋弱旦夕不能自持聞者扼掣然莫能爲力也易百計思惟始攜己子就外家延師與簡書同案讀凡家內諸務皆代爲支持竝經營各婚配有過于己事後簡書卓立不凡試屢冠童軍論者謂非易善爲刻成不能致之晚年特喜施與里邨中貧乏者有求必應至舉債典衣無怨言亦無德色家以故中落而意趣不衰布衣蔬食晏如也光緒廿六年有旨旌其閭旋卒年五十七

劉景輝宗譜

劉景輝
投稿

袁光遠妻鄧氏東里獅灘場人幼知書識大體父母皆鍾愛之及歸光遠敬戒無違逮事翁姑善承意旨每有進奉必備滑甘而自養極薄性特溫惠于里邨之貧無告者必格外周恤之有宴會周旋于邨姑貧嫗尤加人一等由是光遠得賢內助之聲著焉光遠旣久因場屋又家計日衰憤欲焚筆硯鄧每以大器晚成書不負人相慰諭且引家務爲己任光遠見可息肩遂復致力于學文思益進久之翁姑繼逝鄧悲不卒養與光遠飲食必祭有新味未嘗歡然下咽痛翁姑之不再食也光遠垂老終不得志乃講學近邨間子繼助繼文繼正竝從之讀而繼助州

合川縣志卷五十一列女一

十五

試列前茅欲就外傳資觀摩不敢請鄧爲婉言之得許遂歷遊龍門育英諸校學以日益而繼文繼正讀父書非有要事無或輟輟則鄧必督過之若兩嚴父焉今繼助由州師範堂畢業任本里教育十餘稔退事蠶桑有成績繼文畢業師範講習社任縣立高小校教員繼正亦彬彬儒雅有父兄風皆鄧之力多也民國四年卒年六十

東里采訪員
袁權來稿

譙開蒙妻單氏州永里戴家溝人姑李氏苦節三十五年單孝養之歷二十年不衰夫兄開蕃弟開蕙俱早逝旣已奉姑命析居矣單以其妻皆青年嫠居勸開蒙仍舊同爨且婉慰娣姒堅其冰操從子幼弱愛同己出未幾兄子大業病歿許以其弟三子大楹承祧協心教養至成立時始各分產如初而弟子大彬怙強爭良田宅單慨然讓之不與校開蒙故好施濟單力贊之清咸豐末藍賊攻福山砦開蒙隨眾出禦砦得保全而足中流彈傷頗劇單親爲調養年餘弗怠開蒙由此廢舉子業爲綢段商于州城比歿停貿贏千餘金以買田價不足假貸而取盈焉時諸子未成人也單獨力措拄食粥衣褐濟以女紅晝夜作不輟久之田債清猶有餘積子三長輝張增生次鴻淵廩生成都巡警講習所畢

業歷任本州警官次鴻勳仍營綢段商有聲闐闐間皆單教也

興里采訪員譙

輝張投稿

陳世鳳妻刁氏州西里太平場人歸世鳳生子四其季澤民州學生與森楷友善自有傳刁六十時澤民凶森楷文爲壽森楷以駢儷行之藻飾塗墍無足觀覽及屆七十澤民以秋試在省不及稱觴乃自爲啟徵壽曰孺人姓刁氏先世楚籍始祖時範元至正甲午舉人任貴州仁懷縣明初辟難入蜀卜業江津傳十一世曰貽贈武義都尉世澤因獻賊之亂五遷而居合州冠山坪代有隱德人材蔚起如雲南霑益州尉署麗江井鹽課大使後署麗江縣知縣之啟封公江南江甯府副將歷守壽春狼山崇明各鎮封威遠將軍之啟治公皆孺人之從堂高祖行也孺人曾王考諱大觀爲邑名諸生王考諱纘業國學生考諱萬椿國學生孺人人生長世族幼識大義不染驕奢之習逮歸先府君恭順無違府君治家有禮嚴壺奧之分孺人則繩行矩度非姑姊媚送迎不得出門一步客至數日不聞其語聲府君好賓友孺人不備良庖服舊帑裳躬理果脯歛簞米鹽凌襍條次靡遺醯醬椒茴之屬紙包瓦甌菹用有

合川縣志卷五十

列女一

十六

秩府君嚴僻邪之緣孺人申廣義類凡女巫藥漣吞刀吐火蠱惑人心之嫗賣藥拭卜挽繩踏索覬利奸貪之媼杜絕往來事先大妣刁從姑也翼翼趨承食必佐餽必奉槃事繼大妣姚頗難得其歡心語或不合則詰責百端斷斷蠶刺孺人屏息怵怵益欽以邀無怨言咸同之間上天降割海寓塵昏賊匪蹂躪境里老穉獸駭鼠竄適吾家以丁鯨析爨迻居青山寺宅宅故積廢也先府君方興土木之役孺人佐修內政內而井臼蕭條事事草刲外而訛言雷闕風鶴頻警塞堡遷徙靡常長兄廔九令不能得半臂助仲兄五令出嗣伯考維時紀綱出入眾務畢張者孺人之力也孺人性外嚴內溫子嬪女奴舉止言笑近佻達必教以厚重恭默援古昔曲折闔陳媼邨有楊氏女守貞不字始其兄嫂欲奪其志女投繯欲自經遂感其兄嫂卒以善全孺人每與嬪女輩語言未嘗不偁道其事言之未嘗不眉揚神躍若忻熹愛說之不已者以是聞者多潛移默化而不覺也性又彊記吾族自始遷祖已下子孫蕃衍房代衆膠澤民有志於宗譜之役苦難鉤檢有數典忘祖之陋孺人爲語其世系源流曰某房某祖之所出也某祖曩弟幾人某名某分幾支

某生卒何時葬何地娶何氏某無嗣能一一覩縷詳之外家之族姓老幼無存亡亦如之外王妣吳先富而晚貧先府君迎與同居薄其租賦孺人凡有餽遺無不可與府君言者亦復不愆恩戾義當外王妣之病將沒也府君亦病阼危孺人情難兩顧極憂傷唾血數升哀籲室神矢身代府君已而府君稍愈外王妣則長逝矣孺人恐重悲而傷府君心又益之疾而諱厥事府君初不知也孺人每潛涕輒吐血不自禁光緒乙酉元夕府君卒孺人爲盡哀時時唾血左目遂喪明近年翳蔽稍廓清耳甚聰神氣爽健今秋八月七袞初度澤民以鄉試赴成都不能及生日偁觥上壽謹綴行略仰當代大人先生有所采錄潤色鴻文俾歸時陳諸養室則榮無旣已森楷卽爲之頌并序曰光緒丁酉之秋八月初吉吾友陳潤蓀茂才過予省垣寓齋言其日爲例封孺人陳老伯母刁太孺人七十誕辰徵予一言爲壽予惟孺人前周甲時特用予文製錦稱觴無幾何時忽忽遂已十年人事變遷故物非昔獨此蒼松翠栢貞堅依然不知老之將至是不可不志也乃拜手稽首而稱頌曰豸山之秀雲門之靈實鍾淑德渤海遺型爰初在室弱影嫋嫋待姆而行惟父

是聽作嬪有媯鳳皇鏘鳴琴瑟靜好同夢先醒宜家宜室生此甯馨珠樹三秀臨風亭亭烽煙忽警艱難方丁內助外理藹然家庭寡婦旣賦父道兼并羸金祕鑰楹書發局坐見文郎卯角衿青拳拳膺學硜硜說經嚴嫗萬石王母億齡厚德大福如景於形載獻此詞非云譎賡他日請念重醞湘醺意以補前缺也刁後又八年卒年七十九

陳氏敦本堂族譜

李三秀妻雷氏州東里三匯壩人性和順歸三秀敬戒無違十數年如一日逮事祖若翁恆荆布操作手自烹調凡醴飴醯醬旨蓄諸食物皆竭求精潔不假婢僕慮以弗蠲失親悒也故重幃竝偁其孝人無閒言繼姑楊性特嚴不易事雷一以柔道行之遂相得如母女終其身無幾微嫌後三秀沒諸尊人亦先後棄養家政由兄公三清處理內務則雷與嫂同肩之恭謹小心過于疇曩兄嫂待之有加禮其字育子女則所有服食必躬親點檢教之有義方而撫姪男女恩轉渥于所出方少年時家事暇卽自理鍼黹紡績勞動不少停客來飲饌極豐自奉乃獨喜淡素或村姑里媪以窮乏告無輕重緩急必量力力調之或有修橋補路寒衣賑米等捐雷罔不預所出資罔不較他人優佛菩薩■居土優

婆尸亦時時得其布施莊嚴隨喜故晚歲來其子執中鴻漸歲奉膳穀百餘石盡費無存者以此民國初元匪風四煽所在無乾淨土雷念不亟自保身且爲虜何有于家亟命鴻漸練家丁修太平砦築小籌邊樓以自固鴻漸一如其言匪遂不敢侵略迄將十年太平砦在匪巢中獨立不思本雷教也八年卒年七十有三節雷宜人七十壽言森楷附記

劉聰傑妻李氏州東里三匯壩人祖一德自有傳李年十九歸聰傑家徒四壁以教讀餬口咸意李富家女將不堪其憂李處之怡然事孀姑郭有加禮家人宜焉同治十年聰傑卒無子李年方二十六撫夫兄聰述子明璧爲嗣李事親教子淡泊自甘性耐勤勞晝夜紡績衣食差給父二文又時時調之以故雖貧不困然素善居積每有所得不特金帛之屬積不輕用卽母家歲時所餽藥品食品諸物雖數十年猶有存焉梨橘柑柚之果儲之經年色味不變或非時出以供客如新摘于樹者人尤異之以此最先後四十餘年所蓄積可三五千金嘗出以買田宅兩處猶有餘饒而灑埽洗濯之役日必躬親不假子婦他人之手尤好施予遇貧乏乞丐輒如其量與之有暇則誦

合川縣志卷五十一列女一

十八

經齋佛無他營云

東里采訪員劉學敏投稿

李心愷妻池氏來里涇沱場人咸豐五年于歸又三年生一女而心愷歿池年十九姑詢其志以苦守對乃撫夫兄子國璽爲嗣未幾翁卒獨奉孀姑張朝夕色養無間會滇匪事起州人聞警倉皇境無甯宇池于戎馬倥偬間扶老姑挈雛兒避難巖穴而慰撫備至慈孝無虧姑嘆以爲難能旣而烽煙告靖四境無驚池還故居尋理舊緒教嗣子趣學嚴而不殘有和丸畫荻風國璽屢試不售循例入國學非其願也然能體池意勉自刻苦家雖小有仍遵池教專力勤儉日積月累遂置田產多處偁富厚焉光緒十九年池年五十五姑張年八十矣州人爲請旌表報可姑至八十七終池今行年八十存來里采訪員投稿

苟鍾泰妻文氏州西里白沙場人性端莊識大體善操作嫻心計遇人可矜憫及節義困難事輒感嘆不置甚乃淚涔涔下若深切已然者蓋其天稟摯也年十八歸鍾泰重慈在堂侍奉盡禮均得其歡心姑病奉湯藥惟謹寢食且廢經兩載無倦容姑歿事繼姑如所生族

邨賢之鍾泰時方肆力于學不問家人生產日用瑣屑文獨任之既與兄公析產多予以逋負產押金多人或爲不平文勸鍾泰曰翁命也可逆乎逆則傷翁心遂順受不較未幾鍾泰卒家窘甚三子尙幼無所爲文茹苦含冰紉紡自給內理家政外擇師資加有喪葬婚嫁之需益形竭蹶而勉力摒擋不墜家風賓客過從仍烹鮮煮酒款洽如初非至密之人曾不知其貧且困也惟自奉極薄非歲節不食肉非嘉會不易衣非應得之財不容受見人違禮法必斥之雖姑姊姪無敢干以私者子汝光少長赴渝學賈文戒之曰正大立身和平處世事無欺已言勿欺人天必佑尔振興也汝光謹受教後遂有聲渝合間季子汝寬就學戒亦如之汝寬亦以廩膳生歷充高小學堂教員校長爲時聞人光緒六年汝光以保舉同知爲文請誥封旌表得可制曰朝廷重民社之司功推循吏臣子凜冰淵之操教本慈幃尔文氏迺同知銜苟汝光之母淑慎其儀柔嘉惟則宣訓詞于朝夕不忘育子之勤集慶澤于門閭式服自天之寵茲以尔子克襄王事封尔爲宜人錫之誥命於戲仰酬顧復之恩勉思撫字載煥絲綸之

合川縣志卷五十一

列女一

十九

色用慰劬勞當時均嘆爲異數云

西里採訪員
荷汝寬投稿

唐籍悌妻曾氏來里利澤場金鐘寺人年十八歸籍悌三歲而寡未有子也其家詢其意誓言必守乃爲撫一子旋分爨曾刻意教育期于成材而子顧不肖屢戒不悛曾無如何則自理家政斗粟尺布皆躬自料量不予子以絲毫權子亦無如之何也既娶婦生子益勤務節用貽厥孫謀不復責善其子但聽安坐飽食而已而子亦既循循謹飭矣曾氏家故中貲至其父稍益落及兄槐之窘甚光緒某年窮極無聊聞里增生張某母歿未葬遽使人餽張言槐之故母所葬地形勢如何氣運如何惟葬法不佳故吉地不發且益敗今槐之無賴誠以十數金畀之使遷他所而以葬法葬君母福乃无量張入其說遽與槐之議交易而退既遷矣曾始聞其事謂槐之不孝張以奸謀陷之爲誘人犯法訴之州州官與張有舊不爲理再三訴乃得訊又以兩造情願且已成事實曾雖親女已出嫁非訟主勸息事曾不服固請覆訊指駁前判庭辯侃侃官不能屈卒斷張遷去而復曾母于原墓乃已合人皆以癡男不如黠女生男勿喜女勿悲曾亦其一證

云來里採訪
員投稿

李德厚妻周氏州東里黃邨壩人母家爲江北清平場富戶子女多知書初歸德厚人或意其嬌惰不事事而周三日入厨惟酒食是議自浣翁姑衣裙不假婢僕其操作勤勞有尋常家人所不及者迺始嘖嘖異之後德厚卒周慟欲身殉以親老子幼義不得死乃剪髮入棺見意未幾翁卒又四年姑卒伯仲議分居始命子柱就學外傳其先皆自教授之也柱旣長爲周行事紀略曰柱嘗夜讀母作手工伴之問母必讀書將何爲母言富貴非所望期明理曉事不終爲愚人耳時弟尙乳母開懷哺之哺已作如故柱思吾家尙不貧母胡爲自苦問之不奮再問之則怒曰非兒子所知也嘗以折飾之金貸于佃農而薄取其息有餘則分畀羣兒使貯之撲滿或見可憐人欲助之力不足每乞勾于祖母卒給其求不任怏怏去歲時歸甯必有所饋遺外氏亦致餼餅酬之至則徧頒群從與柱兄弟等故吾諸同堂昆季聞母自清平場歸則喜相噉也庚戌母年五十柱將製錦爲壽母諭柱曰小子意大佳弟未能擴充之耳邇者歲比不登鄉貧民苦甚

合川縣志卷五十一列女一

二十

尙爲我散羨餘之儲以拯斯民者詎不愈于稱觴之虛文乎柱不敢強歲中出藏鏹助賑臘底又爲發票出平糶米若干今被澤之家猶時祝吾母百歲恩光亦百歲云然屆懸帨辰諸子姓及姻婭仍群集稱慶躋堂則辭拜于私室乃受或問其故母曰吾不幸寡居禮不可以對先人泰然正受也族人李春田佃無資貸母數十金久不償問之則頻年早收入薄租且不供實未能辦此母遂置不問貧人劉三發窘不能自存貸母十金爲小貿資以活亦不償且久偶與人言及人云三發非此金全家已爲溝瘠若追之是去其母金也唯仍死耳母聞淒然遽召劉還其券其他濟藥施茶捐棺木修橋梁收恤遺棄嬰孩補助鄰兒讀書費諸善舉靡不樂爲獨不喜世俗佛菩薩之說眠齋醮祈福者如群蛆攢矢莫識其然偶有道及則辭而闢之清言不絕不啻悲憫眾生爲現身說法也平居則端坐寡言笑紡績倦一出視蔬作而已雖至親戚未嘗輕履其門其矜重如此此其子柱所云也森楷與其家有舊姻居相距十所里曾不識其母子一面而訪之里人云柱言信因具錄之

東里採訪員來
稿森楷互參

李德裕妻胡氏州東里獅灘場人幼孤母徐再醮依祖宏猷居朝夕誦讀略知大義而性特聰慧每有疑問多得懸解宏猷甚鍾愛之年十九歸德裕生子紹徽德裕卒胡年方二十八姑劉病瘋不能事夫弟二俱朴訥子尤幼穉家務鉅細皆胡肩之胡外持門戶內撫諸孤少暇卽爲夫弟及子授書少長完娶弟婦各有家室錢穀出入猶經理焉現年六十諸孫繞鄰子姪輩分炊已久有事猶奉命惟謹也

東里

採訪員
投稿

高天泉妻曾氏州興里人文生紀章之女舉人時煦之姊也曾承家學略知書史大義年十八歸天泉于城內翁姑健在不問家事無所表見閱四年天泉死遺子一尙在襁褓曾惟任撫養之責猶碌碌未有知名未幾姑卒翁繼娶生一子甫周歲翁又逝世喪葬一切皆曾經營復孝養繼姑恩撫夫弟孤子必恭必謹家皆曰賢及弟子少長則分送學校期其成人旣已析居而弟外遊日多仍不時往問而代理之如未分時焉見有子婦孫男女等八人如古八口之家猶曾一身擔任不以累其子也今年五十有五守節二十八年

興里採訪員
投稿

補遺

朱燿先妻沈氏江蘇吳江縣人順治五年歸燿先爲繼室生子圻燿先自有傳圻爲先妣沈太孺人行狀曰嗚呼不孝圻尙忍狀太孺人哉圻九歲時先君見背惟太孺人是依自出就外傳及探親友外未嘗旦夕相離也當僑寓蘇郡時閒居之餘嘗語圻曰汝父於明季崇禎癸未成進士選粵東仁化令旋改福建侯官令未二月遭時變遷遂棄官去歲己丑贅吾家薄田三十畝僅供饘粥每歲多出遊計在家之日未數月耳汝父以家政有托一切不問吾躬親紡績以資日用未嘗有缺甲辰五月汝父客中病七月買舟歸家至八月初四日卒吾安貧自守惟望汝之能有成也圻泣志之圻猶憶父病危時太孺人憾不能身代割右臂肉煎湯以進之父飲少安越二日乃逝圻少愚陋雖從塾師幾至廢學太孺人曰吾家止此一子豈可任其怠忽不爲擇師以教耶訪諸親故聞蔣曙來先生蘇郡名宿也戊申正月命圻從之游附郡庠何楚蓀先生家書館庚戌春復命圻隨師至常熟縣蔣幼木家朝夕誦讀寒暑無閒圻雖不才不敢自暴自棄以貽太孺人憂然非太孺人之訓誨眞

合川縣志卷五十一列女一

二十二

篤尊禮名師安能如是耶太孺人天性坦直心極仁慈幼事外祖父母以孝聞待下以寬卽有過未嘗譴責惟令績麻織席以佐薪水居常買婢僕俱厚給其值及來贖未嘗取身價任其父母攜歸婚配故人多德之人有緩急貸之歲歉貧不能償竝其券還之凡親屬往來宴集有節供塾師膳極精腆嘗云治家不可不儉待客不可不豐素秉外大父之家訓如是也歲丁巳遇修叔暨叔母陳氏雪村弟靜眞妹來太孺人與叔母處相得甚歡無閒圻與弟與妹亦式好無尤叔資以婚費於庚申冬娶婦秦氏太孺人慈愛有加甲子秋日余國明回合攜郭姑丈書到蘇始商歸計太孺人曰此汝父志也與其客居孰如歸鄉立功名守先人敝廬至戚聚首之爲得也遂於丙寅十月西歸丁卯二月始至合州水程六千餘里涉險無驚安然達岸者非仗祖宗之靈奉太孺人之訓不至此戊辰五月遊庠己巳四月食餼卽於是月終同族兄元修南下六月下浣到金墅婦秦已於己巳四月卒矣庚午二月奉太孺人歸合時太孺人年六十有五家四壁立生計蕭條惟藉館穀爲衣食計且圻歸鄉時舟中犯風霜積勞成疾太孺人茶蓼自甘惟以圻疾爲憂至晨

昏菽水無供未嘗有怨憾之色嘆息之聲太孺人誠賢矣哉自先君逝日迄今四十六年以家貧未克表揚苦節而太孺人遽舍圻而去生無以爲供養歿無以爲安厝賴親友之力得歸寸土罔極之恩未報萬一嗚呼痛哉圻尙得比數於人哉太孺人姓沈氏蘇州府吳江人前明工部侍郎江村公曾孫女庠生希聲公長女生明天啟五年乙丑十一月初一日亥時卒康熙四十八年己丑十月二十一日亥時享年八十有四子二長早殤次卽圻嗚呼不肖圻尙忍狀太孺人哉聊於哀毀之餘約略太孺人之生平竝誌里居氏族存諸家乘俾後人知身之所出以誌不忘云爾圻詞簡淨質朴不爲夸飾雖非極筆諒無媿語錄之以待方聞之士備要刪焉

三餘文鈔

易良祥妻李氏州來里大河壩人其先世居湖南之新化縣笄年歸良祥言笑不苟動遵禮法良祥甚相賓敬清初川地荒蕪詔募楚贛之民入川墾闢良祥奉母命至州相視歸謀盡室來徙未發而卒康熙四十六年良祥母年九十七矣以前言未踐心致歉然復申命李再往誼不獲辭束裝拜別惘惘有可憐之色攜二子國仁國義與俱國禮其季也

合川縣志卷五十

列女一

二十三

留侍終養焉閒關跋涉而來聚族於合之來蘇里白菓灣佃耕而食生計惟艱負米轉輸輒操其贏以資補助力農服賈具見古風總之不離乎勤苦者近是少暇出戶採薪躑躅閒拾一布囊中實而堅諗其爲奇貨也持以歸懸諸牖上命國義道旁守候未幾其人蹤跡至倉皇殊甚問曰客何爲者其人曰我米商也偶爾憇息適遺二百金有奇直性命依之矣又曰若能記憶之耶延之入其家氏探悉來意啟視之果無毫釐爽遽命盡數擲還焉客取十金爲壽氏愕然曰我以不貪爲寶今於重且多者尙藐之若浮雲顧區區者而反喪其所守乎卒不受其人感謝而去甚矣廉節之難也以至可欲之物而能保無欲之天以曲成其素志卽在鬚眉男子猶未易數數觀執此以求諸巾幗中豈非絕無而僅有者哉如何氏之光明磊落對天地而質鬼神其所蓄積者厚也信報施之可憑宜乎眷顧頻殷默相呵護不數年宏開堂構樹立梓桑傳十餘世而豐亨豫大流澤益新知當日之貽謀爲甚遠矣

來里採訪主任莫致中稿

卿思茂妻趙氏州人及笄歸思茂爲繼室年二十八而寡無子遺前妻子述銘將成童家赤貧無以資生活將廢讀趙念家門所繫不可以無

教乃典服物脫簪珥爲送讀之資而自勤鍼黹甘粗糲無所于怨時人
稱賢母焉述銘體其意卒以成業家由是起其同時前後以養教前妻
子女有聞者若邱玉琳妻李氏黃代賢妻李氏唐宗華妻李氏楊通極
妻劉氏劉肇甲妻苟氏王炳煊妻劉氏事蹟略與趙同惟楊劉氏別有
傳餘具邦媛譜

寇宗重慶府志
森楷附記

朱宗憲妻劉氏州城內人歲貢生朱虎臣其子也虎臣自有傳嘗爲憶
母吟序曰母年未笄適吾家時先大父棄養大母魯多病母氏刲股進
食者再曾大父九峰公猶在堂持家以清正勤儉爲訓凡內外行止語
言如法晚年家居每日五更初夙興類面整衣冠登樓誦文昌大洞經
一卷吾父實左右之誦畢未黎明茶湯必集家無婢僕而司中饋議飲
食奉養母氏一人之力是主迨吾父承嗣亦惟先訓是守故名其堂曰
思訓然吾父性剛母氏以柔相之有不合於時母氏婉言勸之當虎之
就傅也家貧甚母氏以紡織佐饘粥一燈伴讀漏三下始休弱冠入州
庠旋食餼欲就渝州聘以資菽水遠遊實不忍言母氏豫察之曰汝父
年雖老精神尙強藉此可努力讀書古人有百里負米者此其時矣不

合川縣志卷五十一列女一

二十四

得已館渝七載及吾父病故因辭歸養母家亦差不貧母氏不令奉養
少過曰汝不能苟合於世儉薄免求人也間有窘亦不忍言母氏談笑
自若曰汝家固寒素也吾處之歷有年矣汝其不安乎親舊小有施與
赤貧士來學者助之膏火母氏力贊成之惟恐事不諧曰汝多方爲人
方便誘掖以成人才冥冥未必無知之者嗚呼母氏之德曷有極哉母
氏之教何日忘哉其詞曰憶母孝閨箴女史早則儆于歸無違敬戒教
堂上高堂兩歡心豈獨承顏在笑貌憶母慈溫惠淑慎性生之相夫以
順家其宜大姑小姑皆善視何況諸昆絕嫌疑憶母勤曉起操作到夕
曛手奉羹湯色欣欣篝燈課兒深訓誨機聲四鄰動宵聞憶母儉甘旨
不豐情懷歉其餘節制咸知檢截髮有時效古人卽今稱賢亦無忝蓋
昔賢述祖德詩之流亞也其無浮詞自無媿色讀者當不謂非信史云

味醇軒
詩草

潘大章妻羅氏州西里人歸大章生子三大章復娶妾唐氏生子二羅
妹視唐撫庶子如所生有賢良稱旣歿踰年庶子開錙爲其行述曰嫡
妣生而柔順最爲外祖妣所鍾愛逮歸家君夙興夜寐敬戒無違事祖

妣張太孺人行已小心從無一失祖妣喜之每嘆其誠篤咸豐丁巳春祖妣病彌月侍其左右連宵不眠兩目盡赤及其歿哀號逾常爲之茹素者四十九日性尤與人無忤人有過失聽其自改從不之責凡家中小兒他人幼子甫能行步稍有知識莫不因其慈愛叢繞膝前夜眠不去鄉鄰婦女以及內親至戚亦多稱其仁厚喜聞往古事閒召銑等言之至其可悲可憐者如武穆王金牌召回全家遇難與比干剖心緹縈上疏之類輒不禁爲之泣下至其可驚可喜如十二甘羅便登卿位八十尙父始拜王師與文姬返漢木蘭從征又不禁爲之稱許尤不忍戕生命雖有嘉賓戾止未嘗輕割一雞卽不得已命厨人宰之亦遠避不欲見其死刺繡之工則精奇絕倫實關天性偶剪通草刮絲絨藻繪蝴蝶使兩板臨風紅黃交錯望之栩栩欲飛繡鼠花上探頭拖尾鬚毛生動勢同跳走他人愛而學之終弗肖也雅以勤苦自勵紡績之聲與子夜杜鵑之聲兩兩相應雖寒暑不輟銑嘗恐其過勞勸以休息孺人則曰我不欲空過時日借以遊手身雖勤心固閒也汝恐我勞我何嘗勞哉獨飲食衣服節儉奇甚每飯之間盤盞堆積熱氣撲撲高出於頂皆

瓜果菜蔬絕少肉食中年始製布面羔衫一領猶恐其敝宴會之後卽脫之代以黃袂襖子一衣必數載自洗自漿至破爛莫可補綴而後已無何銑母於同治三年甲子春病孺人憂之時見於言銑母歿於八月廿二日寅時孺人便子孑孤立行處坐卧不自安焉卽於十一月二十日陡染風疾亦至二十二日巳時遂歿人皆謂不忘其伴兩妣之和諧於此可見矣又爲生母唐傳曰先妣姓唐氏外祖正綱公博學多聞外祖母周夙嫻姆教生母一人幼明敏讀書史習內則外祖特鍾愛之及歸我家君敬戒無違與嫡母和諧盡婦道潔滌隨勤謹篤至深得祖妣張太孺人歡心嘗稱之曰是真吾兒佳婦也洎道光二十六年丙午祖母抱重病幾垂危母氏焚香告天乞減己壽以益姑疾竟獲痊越後十一年始歿姑母高家中落祖母歿後餽問殷勤無異在日每歸來潔盥脯同卧起若恐其一意之不適者錦乘間請問母曰此汝祖母意也吾誠事祖母敢以歿而逆其志哉言已泣下慟祖妣之不復見也性儉素薄於自奉雅好施予戚里以窘乏來告無不稱其意以去居恆瞑目端坐移時始起間或諷誦金剛心經及救苦感應陰騭等篇有勸母禮佛

者獨不允曰誠能靜中收攝精神無使遊放則心體湛一絕六塵空四相可馴致矣不然者口頭持誦雖日拜跪於佛前奚益哉生平無疾言厲色於教誨獨嚴嘗謂子孫無論智愚皆宜令讀書以求明晰聖賢道理庶不失爲端人正士憶去夏院試銑錦侍疾不欲往母促之曰吾雖病決不遽死汝二人心心在吾必邀天眷去或幸見兒輩之成也及試弗獲母乃慨然曰兒輩讀書固非爲功名計也雖然苟能力學攻苦不廢青燈之志豈終無顯達日耶以故錦述哀有云青燈攻苦言猶在白髮承歡願已違誌母教也母多智數咸豐十年李匪亂漢中父及家人多上砦支持公務砦離家五十餘里時烽煙四警人心惶惶母率家人操作如常且布置家事井井有條忽一日召家人語曰如今上砦事務措辦已妥聞賊情甚詭其眾旦夕必至可以去矣去之日四鄰婦女扶老攜幼擁道啼泣不忍其去母亦爲之泫然相慰良久始行果不閱月賊眾大至擄掠人民爲之一空至于祖功宗德刻不忘心嘗曰吾雖未能周知其詳猶幸得而言之然其面不可得見每於一食之間一飲之頃若覩祖宗在前故平常果物得之必薦薦之必誠非謂此足報祖德覺不如是心終不安也外祖妣周年八十餘苟有食物雖相隔數十里必遣人奉之及其人回又必詳詢其飲食起居至聞其疾病則隨爲趨視聞其康健乃喜值芳辰令旦輒曰吾家人樂處一堂老母桑榆晚景兩地睽違追思當年相依膝下不可得也言已泣下每佳日不過賞其心悅其目貧苦得此佳日便於肩挑背負買賣往來因之豐衣足食仰事俯育可知天心至公富貴見其佳貧苦亦見其佳無如佳日不常有而貧苦常多彼覩風雨連旬仰屋而嘆者天下恐不少斯人也吾安得此日長佳以便天下貧苦或見兒輩折一枝籠一雀必戒之曰天地生物未嘗不欲各順其性汝輩不能爲天地培養又從而戕之是逆天也逆天者不祥況物之望生與人無異特不能向人言語汝輩正當憫其不能言語而何忍害之母別無嗜好惟愛黃華謂是華非獨賞玩悅目作枕延年清香遠播有類君子聲名嚴霜不凋直負剛人志氣當春日融和率家人分苗插土保之若嬰兒愛之同痛癢相其地之瘦肥量其泥之深淺避其處之燥濕遠其物之殘傷旣而晴久則時爲灌漑雨久則常爲疏隄迨乎秋風旣動節報重陽攜二三孫子步履其間撲蝶評

花未嘗不灑然而樂也先妣生嘉慶十四年己巳十二月二十四日子時歿同治三年甲子八月廿二日寅時享年五十有五子五長開銳次開銓四開錠嫡母羅孺人出三開銳五卽不肖女二孫男十一人均幼歿時錦等跪請遺命母肅然曰汝曹蒙先人遺業當持盈保泰其要在正心術敦倫紀立家規教子孫諸惡莫作眾善奉行吾願兒輩守之吾尤願子孫世世守之也囑畢唸佛含笑而逝

潘氏支譜

李定晟妻林氏合州東里錫匠岩人年十四歸定晟定晟父兄世執煤礦業獨定晟喜讀書不事家人生產父兄弗善也林婉慤將順尤善中饋翁姑既喜之而奉事特謹舉日用飲食皆先意承志雖煩勞無于憚家人亦相安焉定晟初數奇年三十猶應童子試道光丙午家遭逋負訟法當繫家長定晟念父老不勝苦且入獄則無所措手銳然以代父請官許之遂頌繫于理會值科試林請其父爲保釋得假出獄因入邑庠明年補廩膳生文名藉甚渝商某延課讀其家賓主相得良歡定晟以家累告卽假貸二百金俾清夙逋仍理舊業定晟父國彥每顧林謂若夫成名我家得康復非汝力不至此時嘉嘆之林遜謝不敢當處伯

合川縣志卷五十一列女一

二十七

季先後聞未嘗一言自功也先是林生子三成豐初忽殤其二獨仲子膺存定晟慮單丁不可恃納妾于渝初未相聞也及歸林不以爲嫌視之如妹定晟意大安後妾舉丈夫子二如初志林保抱提攜之與己子無異子亦不辨其母誰何矣咸豐末滇匪擾境避亂釣魚山子膺婦陳從謠傳賊夜至閣砦洶洶陳驚悸死遺子昌運甫二歲林撫如己子久乃爲膺續娶梁生昌達未幾梁又死林兼撫之定晟顧林笑曰汝垂垂老矣猶作九子母邪其意態可想初煤業旣復家漸小有及連喪子婦翁姑相繼沒又兩遭庚午丁未水災定晟出恩貢後不久下世家稍益不支林竭力摒擋恩禮無所缺人不覺其窘昌運少長林教之曰汝父成年後以家事廢讀書香莫繼家亦無起色汝祖望焉今承先啟後之責萃汝一身不及時早圖嗟何及矣昌運謹受教勤苦自勵清光緒初游泮林爲色喜又數年以末疾卒昌運及二庶子竝哭之哀固禮在則然亦其恩有感之深者昌運後以歲貢分發甘肅候補縣丞見充志書

編纂員

梁權焯林孺人
家傳森楷附記

陳周祿妻卨氏州北城人年十四歸周祿周祿故世族子早失父母依

兄周禮居別學貿棉花業學成歸娶年二十二矣囑高事嫂如母從之
高連生女二周祿以食指繁寄居非久計奮欲圖自立遽走族間告借
貸冀得數十金爲貿本往返旬餘空手而回相對嗒然高亦不知所出
叩囊底獲百錢姑俾至茶社集友朋謀之有師兄武某慨出八十緡賃
屋夥貿商業由是起師兄者州人謂同學貿而先至者也周祿既有資
高又佐以紡績拮据數載獲利益豐債務履行之餘猶有蓄積卽迎兄
嫂還與同居繼嫂氏李亦相助爲理家以蒸蒸日上高亦生子昌陽矣周
祿以繼兄爲大宗兄旋病故待嫂禮加優嫂意安焉又四年子東陽生
周祿時已買田三百畝謂于願已足不復事封殖高贊成之凡鄰黨族
戚以情來告貸多寡唯適無徒返者蓋懲于已前事而歸長女于武氏
則酬其貸本之惠也咸豐六七年間粵匪竄擾商旅不行周祿欲停貿
未果忽一病不起遺囑賣田三之一清貿債高泣言勸業非易君萬分
一不諱妾惟勉理舊業教子成立以副君心耳何遽賣田乎言已周祿
遂瞑高營葬畢仍理棉貿巨細躬親是事求實貿徒無所牟大利則欺
侵而乾沒之高覺其奸顧發則彼此不利姑含容隱忍持大體設方略

使悉就範圍得虧而不損如是七年債完款裕餘千餘金舊有田如故
人謂非高明達不至此而高則以二子漸長擇師課讀關係尤大必孳
孳營利荒廢此事必所得少所失多矣于是停業不貿專注意于課子
讀書雖武氏女故次女適何百日而孀一省視之而已不遑深卹也同
治六年昌陽入邑鬻九年庚午舉于鄉十年東陽游泮十二年餼于庠
十三年昌陽考授內閣中書留京供職請封高宜人晉封恭人人以多
高之教子有方也高初不以自功光緒四年昌陽假歸省親未至而病
至乃續假養病明年東陽妻王卒遺子啟鴻三歲啟鵬半歲啟鴻固先
以嗣昌陽者至是失其本生母昌陽妻江不能兼養也高則與分撫之
已不免勞擾矣無何昌陽卒踰年東陽又卒實高六十有二誕辰之前
一日也疊遭慘變痛不欲生冢婦江暨次女何苦勸慰之乃強茹苦痛
更撫孤孫養教兼施心力交瘁以十三年正月卒年七十後啟鴻啟鵬
同年入泮高不及見之矣次女何自有傳

節陳啟鵬高
太宜人傳

易開勳妻徐氏州來里雙財門人文學張鵬翔爲其傳曰孺人性溫良
事姑維謹嘗曰吾不及事吾舅幸及事吾姑婦道庶盡萬一乎娣姒四

人皆能親睦之如一母所生者離居後去舊居頗遠園蔬新熟必躬自提攜奉姑先嘗而與娣姒話久別如隔世歡肇緯公嘗因家事頗不能平孺人諫曰難得者兄弟得失細故不足校也公乃釋然又嘗索債不得憤欲焚其券孺人復阻之曰焚之則終不可得還之或少有所償耳公從其計果得百金孺人生而婉婉長益端莊雅不喜御鉛華及家益落雖釵荆裙布亦不失大家風範而操作過于男子憫肇緯公勞不欲以家務累公內外鉅細皆一身經理農功迫時卽芻牧耘耔等事亦躬親之若并忘其爲巾幗者夫婦人鮮事詩書罔知禮義往往視尊章爲路人或以長舌而階厲或以家貧而反目中饋無一能反食焉而怠其事若孺人之事孀姑和娣姒則婦德有焉諫不平阻焚券則婦言有焉謝鉛華守風範則婦容有焉理家務助農工則婦工有焉生子六人飲之食之教之誨之成立娶婦視如己女不以愛憎而有厚薄一室融融無勃谿聲傳曰姑慈而從婦順而婉其是之謂乎孺人先肇緯公一年卒壽六十有九時光緒庚寅八月初六也肇緯開勳字自有傳易氏族譜

易興亮妻吳氏州來里庾家灣人性端莊靜一不苟言笑父廩生欽齋

合川縣志卷五十一列女一

二十九

奇之擇以歸于興亮事孀姑章極謹竺章病巫醫罔效垂死矣吳遽剖股和藥以進飲之而瘳後興亮病如之聞者以爲誠感所致理家政尤井井有條光緒中子孫眾多歲費不貲而撙節之餘猶能購置田業二十餘碩夫子方憂貧得此遂無復內顧一意進取吳之力也某年以子顯珩貴封七品孺人卒年七十又四及孫朝佐任巧家廳同知循例請貤封特贈恭人然易氏固多賢媛其前此者有易至鐘妻簡氏易肇廉妻王氏易肇慶妻羅氏皆剖股療夫得瘳以事未彰聞無從旌表旣見于邦媛譜更埶著之于此易氏族譜興里採訪員投稿森楷埶記

顏澤沛妻饒氏州人年二十五孀居撫子崇經崇緯成立爲崇經娶于喻崇緯娶于周喻生子懷本崇經故喻年二十五崇緯故周年二十三無子以懷本兼祧三世一兒重可知矣饒恐失教則不才雖有若無仍率厲二婦養教維嚴卒以成立光緒初饒年七十喻年四十九周年四

十四竝存

程業修合州志

劉肇■妻張氏州興里虎頭砦人光緒二十六年以節孝被旌表其族孫運熙爲之立傳曰孺人姓張氏倒石橋儒家女生而端重寡言笑聽

兄弟說經史輒通大義年二十適平軒嫻於禮法事舅姑孝處娣姒和撫諸侄如己出勤織紉謹蓋藏潔蘋蘩治庖厨凡一切內治諸務莫不井井有條得闔室之歡心焉結縭四載平軒病歿孺人痛不欲生第念孤女方彌月夫未立嗣舅姑將何倚視含殮畢卽泣拜舅姑前又回拜諸兄求爲立後必得請而後起時兄公靜軒次子景佳字漸入方數歲卽指與之孺人愛逾所生而教之有義方翁姑相繼辭世克盡哀禮每祭優聞愾見如慕如疑事之如生時漸入稍長督課頗嚴遇故實可資勸懲者必反覆申明俾知法戒或不率教卽涕泣而道之終日不食務使改而後已故漸入以謹厚稱者母教然也而居家嚴肅具有規則茗粥蔬食靡不親臨昏定後必持燈視門戶厨竈而後寢數十年如一日嘗語漸入婦曰婦人無外事然須識大體詩書之家往往解吟咏工翰墨而井臼操作米鹽瑣屑皆視爲末務則主中饋者謂何耶然待僕婢至寬非造言構釁者未嘗斥責之卽斥責當時而已後亦不復追論其慈祥和藹之衷非常人所能及可知矣女後適易華廷庚子歲孺人奉旨旌表閱四歲子與長孫運涵先後不祿與子婦陳氏撫次孫運錫成

合川縣志卷五十

列女一

三十

立見已婚王氏矣孺人今年七十有七而矍鑠猶昔殆天以壽報其德

與興里采訪員
劉烈休投稿

蔣澤澍妻徐氏東里三匯壩人生性寬和在室與諸嫂皆宜待子姪尤有恩禮堂弟庠生亮臣姪廩生光斗皆敬重之同治六年歸澤澍于康家漕善事舅姑和睦妯娌以賢孝聞至年三十不育念孟子不孝有三之義力勸澤澍納妾張氏竝捐資倡修安全砦平治華銀山大庵溪口三倒拐等處大路暨魚漕河石橋頭到河跳磴刊善書施濟米等善舉旋生子二徐提攜保抱視如己出及長竝教之讀有不能讀則使之耕不令游手好閒成流氓也母雷早歿父錫敬鰥居雖有子孫無財不可爲悅徐迎養至家備物盡禮以天年終光緒二十七年徐卒年五十二

東里采訪員
投稿

但占雄妻吳氏州西里太平場人占雄武生見民獻譜吳年十九于歸四歲占雄殉難吳聞耗不食誓以身殉或勸以遺腹未乳如死是再斬但氏也如大義何吳悟乃疆起治事未幾生男肇興翁正元姑王皆鍾愛之吳體其意恩勤特摯而二老皆垂暮啟處須人吳晨昏問視授几

授杖未嘗失禮王老病淹牀蓐吳奉湯藥恒經月不解帶王稱之曰賢孝王卒事繼姑文尤有恩禮能得其歡心前後二十餘年無間而肇興已成立矣先肇興幼時以孤雛爲大父母哀憐不欲加訶譴吳亦未敢誚之少長學猶未成吳慨然顧念以謂守節易撫孤難富而不教將卽悖淫不特無以振家聲其何以見先人于地下乃不惜重幣聘邑歲貢張德紳主其家供給優渥三年如一日時張有時譽羔雁爭迎張欲有他就吳浼親友挽留不可則自出見之言詞悻悻淚隨聲下張感其誠不忍復言去又三四年迺館則肇興有室而德行亦足以自立矣後肇興遂爲克家令子固張之善教亦吳能擇師之力也吳旣交家政自以歲入頗饒勅肇興于家用外多行利物濟人諸慈善事爲保家之本因倡興寒衣會歲施綿衣百餘襲于貧苦鄉人復募集多金置涑灘場田業爲會基柢期垂久遠今已四十餘年會猶無替光緒十一年太平場災吳施米二十餘石作賑濟其不能復業者更量給錢文俾仍營小貿由是資以全濟者數十百家場人至今猶稱道焉有族女適葉氏者及鄰婦顏宋氏並以親老子幼孀守無資擬再嫁以活全家吳聞召問

合川縣志卷五十一

列女一

三十一

所須卽如其言爲按月計口授食仍令其子擇業自濟二氏遂得全節以終其家至今嘖嘖頌之鄉敝俗產女多不舉出腹卽溺斃吳以爲傷生理逢人輒勸導勿然風爲之止然終有貧不能育者往往乘夜送之門吳得卽收養訓誨如女成人則具粧遣嫁如是者非一不以爲嫌人以知吳之好行其德由天性也光緒二十七年卒年六十四三十三卒肇興爲請旌表入祀節孝祠

西里採訪員陳念祖投稿

張天光妻陳氏州東里大井灣人初于歸時僅有姑在陳事之恩禮兼盡姑因安之飲食非其親調不甘使令非其親承不快也前後三十餘年初終無間鄉人稱曰賢孝天光家故中資于力農外恒持籌握算操計然術以自補陳佐之勤儉出少入多遂置田業數處伯叔坐享其成陳終身合爨一無間言和樂且耽說者謂有義門之餘風焉兄公天授夫妻繼沒遺子五女二皆幼未成立陳分別教養不以爲勞籌辦婚嫁優于己出後數十年其諸眾子女追憶前塵猶謂非吾叔母賢不有此

也同治

年卒年六十有

張氏族譜陳廷瑞
陳孺人六十壽序

李二文妻郭氏東里三滙壩人咸豐丁巳年卒其子三清爲其行述曰

孺人父宗翼母苟文學忠義苟文燦其舅也生性仁慈端謹年二十歸我先考華國公時祖妣蔣歿繼祖妣黃在堂孺人左右就養無幾微嫌疑不數年黃寢疾爲之侍湯藥勤扶持衣不解帶者累月及歿哀毀踰節復事繼祖妣陳又爲所鍾愛孺人歷事兩姑皆得其歡心其先意承志有非不肖所能言傳者時我族人漸繁衍雖各分炊猶聚處老屋一域少不慎嫌怨生矣而孺人敬禮爲長慈愛卑幼諸姑伯姊親如同胞數十年若一日焉其至性至情戚里諸母今猶稱道弗衰生平寡言笑待僕婢亦無疾言遽色戚黨宴會笑語誼譁孺人臨之默然而已家居勤儉當道光咸豐間家雖漸興而一切酒漿菹鹽之需無不躬親操作平日衣履布素第求精潔家雖製有羔裘至嚴寒猶不御曰我諸姑幾曾服此也而奉翁姑待賓客乃極豐腆不肯一毫苟簡使不肖長得朝夕左右聆其教誨親其懿型報罔極於萬一豈無成至是耶無如不祿行年二十九遂病病至三十一疾大漸憑几呼清曰清來前母病死此矣吾不見汝成立汝其兄友弟恭好讀書弗解勉爲正士毋忘母之遺訓清時才十二歲聞斯言不禁悲感淚下至是日午刻而孺人逝矣嗚

合川縣志卷五十 烈女一

三十二

呼小子德薄有致於斯耶抑命途多舛有致於斯耶哭之孺人不及聞也乃含悽珥筆述之如此

李氏譜

戴敬修妻王氏州比城人初歸敬修家微也王典釵釧得數十金爲敬修營貿基本自以紡績佐之家因以起道光中敬修卒咸豐四年子繼典遊夔王年亦七十矣其壻朱奐爲壽之云中築屋兀坐無聊嘗信步出城北過內弟戴從五家岳母王孺人汲泉煮茗絮絮話家常事宅負郭臨大江每一憑欄望隔江一帶遠山青蒼如畫孺人時亦曳杖其間指點雲樹風趣天然此予近年養閒之一法也今年春從五遊泮水秋九月爲孺人七十令辰從五請於予曰母氏老矣典將吹鳳笙擘麟脯獻流霞九醞觴以壽吾母乎則神仙之事不可致典將捧檄承歡安車迎養起居八座以壽吾母乎則有志未逮區區介壽虛文非所願也願得子一言以光家乘子毋作文字寫作家常道可也予曰唯唯孺人生平懿行予知之予不盡知之子盍悉爲予言從五曰母性淑慎事外祖父母以孝稱歸吾父敬修公時四壁蕭然饗殮不繼母悉典釵裙得數十金佐父經營兼以績紡不數年家漸起先是貧無生計祖父母菽

水父與諸父分任之至是衣食粗足母勸父獨奉甘旨母多疾艱子嗣撫伯父次子繼助承祧又勸父娶母氏伍生典兄弟五人母愛如己出深恩罔極於典尤甚焉繼助兄早逝嫂孀居扶持矜恤賴母之力居多典未成人父遽棄養母延師課讀和熊丸以助勤典至今始青其衿典何以慰母之心副母之望耶予聞之嘆曰賢哉母乎夫宜男有草療妬無方一念之私絕人百代之嗣古今同慨孺人念切宗祧一詠小星而芝蘭玉樹次第生於庭階且弱冠成名早食詩書之報諸孫亦頭角崢嶸生有奇骨一綫之延承承繼繼綿宗祀而振家聲所係固非小也節婦與孝子忠臣並重而委曲調護數十年如一日孺人實玉成之賢哉母乎其明大體曉大義求之鬚眉猶難不意於閨闈中得之其得壽也宜哉猶憶敬修公在日予嘗侍公左右宅心行事予親見之公長者未嘗與人爭遇鰥寡孤獨癯老疾廢及貧乏不能自存者陰濟之不吝多金夫有德者後必昌從五昆仲善繼善述學醇謹毋學浮華學忠厚毋學刻薄爲善不沽名讀書期遠大樂東平王之樂志范秀才之志將見鯉化鵬搏青雲直上慈闈白髮紫誥榮膺其顯揚豈僅如今日已乎予

合川縣志卷五十一列女一

三十三

隨萊子斑衣後采黃花酌延齡酒對北堂上壽以家常語下之仙乎仙乎更何處是洞天福地也哉應從五請信手寫出稱觴諸君見之作文字觀乎直作家常聽耳朱文不苟作而稱道之如此其亦如郭有道碑之無愧色者與因具錄之

師竹軒
文賦

李萬春妻任氏州來里利澤場人笄年歸李李世居城南銅梁山山下之陽和溝家不豐而有橘有園圃差足自給其世代相傳子甫成童卽令就外傅學生理學成乃爲定婚婦入門卽判令自食或同食亦必有以供饗殮不以食指累父母子或能養則兼養之無成人成家而終身仰食者萬春故習山貨貿駐嘉定叙府日爲多旣娶任則遺家州城大南街使領鍼黹若冠履諸女工食力以自活任荆釵裙布茹淡居貧一切安若素故萬春終身在外而內顧無憂旣十數年舉丈夫子五乳哺保抱任一身兼之少長使從師不姑息輟讀仍就各商號學爲商如先人故事而長子國忻與何某夥錢莊操奇計贏特工心計不數年大獲買申氏祠街房以居任見能自立乃迎姑謝于家奉之未幾卒葬如禮久之國忻以巨金貸妻兄某參州吏半年禿去金無歸或勸國忻以半直

接其參得可參者吏充役時州官所索之陋規費也國忻有幹辦才是
以由商而吏曹部帖然然參費雖輕合前所貸折數則重且過倍役滿
無所贏聞萬春外貿入頗豐望分其歸裝得彌補所失俄萬春死餘資
僅供殯殮及送襯費他不能爲益乃鬻申祠街房以償時同治八年也
任既悲子遇又悼夫喪幾慟不欲生既念徒死無名仍歸陽和溝理園
橘蔬果之屬晚汲晨炊躬親操作頗能自立適國忻營貿渠縣之三滙
鎮亦稍致餘饒遣使來迎養欣然往從之至則兒孫羅列女婦成行已
無所事事轉不以爲便然見次孫能讀書輒勗以歐柳之母之所以爲
教者殷勤甚摯定瑩亦仰體之修學有加光緒二十八年遂以州學生
領庚子壬寅兩科鄉薦任年已七十七矣又六年卒年八十三定瑩■
歷充合州中學校縣立女子師範學校校長今存

本局編纂員
李昌運投稿